

La pli liunga punt pendent

La sonda vargada ei ina part dils habitonts da Mompé Medel seradunada ella caplutta da Sogn Valentin. Buca per celebrar in survetsch divin, mobein per endriescher dapli dil project per colligiar Mompé Medel cun il vitg da Mustér.

ANDREAS CADONAU/FMR

Applaus han ils iniziants dalla punt pendent retschert la sonda vargada ella caplutta da Sogn Valentin a Mompé Medel. Il president dall'uniun La pendent, *Christian Loretz*, ha presentau alla populaziun da Mompé Medel ed als hosps da vacanzas il project che preveda da colligiar il vischinadi cun Mustér via ina punt pendent. Christian Loretz ha schau repassar las numerusas variantas ch'els iniziants han evaluau dapi igl onn 2019 per surmuntar la val che separa Mompé Medel da Mustér. El han contactau divers uffecis cantunals, las organizaziuns per la protecciun dalla natira e cuntrada e schau elavurar rapports che confirman ch'il project secumporta cun la natira e la cuntrada. Els iniziants ein secunvegni per la varianta da Sontga Gada dalla vart da Mustér a Ragisch sut il vischinadi da Mompé Medel. «Nus savein presentar oz in project digns da retscheiver la lubientscha da baghegiar dil cantun.»

Ina punt da pedunzs

La punt da pedunzs da 285 meters lunghezia e 100 meters sur il fons dalla val duei buca mo daventar ina attraziun turistica. Ella duei levgiar als habitonts e hosps da Mompé Medel il viadi a pei a Mustér per contonscher il traffic public. «A pei ston ils habitonts e hosps serender oz tras il tunnel entochen alla via dil Lucmagn e quei ei liung e buca ferg attractiv.» E pigl auter ha il tgamun dalla uniun La pendent fatg attent alla via dil Lucmagn ch'ei adina puspei interrutta per quei che greppa e crappa crodan sin via. «En quei cass po la punt pendent esser ina



Da Sontga Gada entochen Ragisch sut Mompé Medel vul ina uniun realisar la pli liunga punt pendent dil Grischun.

FOTO MAD



Ils iniziants dalla punt pendent cun Christian Loretz alla testa han envidau la populaziun da Mompé Medel ad ina sera d'informaziun ella caplutta da Sogn Valentin.

FOTO ANDREAS CADONAU

alternativa per contonscher Mustér.» Perschader ils presents ella caplutta da Sogn Valentin ha Christian Loretz buca stuiu. Els avantats per il vischinadi da survegnir ina punt pendent che daventass la pli liunga punt pendent dil Grischun han perschadiu. Damondas ein vegnidas davart igl access da Mompé Medel alla punt. Sco quei che Christian Loretz ha explicau colligia la punt la via historica romana dad omisduas varts dalla val. Duront la stad san ils pedunzs suandar quella via naven dalla punt entochen Mompé Medel ed igl unviern stat la via militara a disposiziun. Ina via construida antruras dall'armada per segiar igl access a lur indrez ella vischinonza.

Dapli valor per la via historica

Il president dall'uniun ei perschadiu che la via historica che meina neu da Mustér giaden el fons dalla val e da tshella vart siado a Mompé Medel en direziun dil Pass dil Lucmagn survegn nova valeta cun la punt pendent. «Nus havein schau examinar e confirmar quei da persunas dil fatg.» L'uniun La pendent dumbra ussa 100 commembers e Christian Loretz ha intimau ils presents da far reclama per l'uniun e per il project. «Dapli commembers che nus essan e dapli forza havein nus da realisar la punt.» E da rimnar ils daners via sponsurs e donatur. La plipart dils 1,8 miliuns francs ch'igl entir project cuosta sto l'uniun recaltgar da vart privata. Vendergis proxim presenta Christian Loretz il project al cussegl communal da Mustér che ha da decider davart la revisiun dalla planisaziun locala. Ina revisiun ch'ei necessaria per realisar la pli liunga punt pendent dil Grischun.

Per regla buca sulet in, mobein plirs Mosers

Il resun sil clom dalla Pro Laax ei staus gronds e demuossa il grond relasch e la varietad dil caricaturist Hans Moser che havess contonschiu la dumengia vargada siu 100avel anniversari. E gest quei gi han biaras possessuras e possessurs da sias caricaturas presentau ella Sentupada a Laax lur Hans Moser per schar fotografar ed inventarisar il relasch digl artist morts avon diesch onns. Els biars ein buc en possess da sulet in Hans Moser, els han presentau a Laax ina gronda schelta da caricaturas da tut gener. Hans Moser ha fatg sias caricaturas per revistas, per anniversaris e giubileums e per amitgas ed amitgs. Desseigns che procuran buca mo per in surrir, mobein tradeschan ina vesta sil mund magari visionaria. (fmr/ac)



Erwin Ardüser ha cumprau ina ni l'autra ovra, quella ch'el tegn enta maun fa speranza sigl uffieri.



Gion Balzer Casanov cul dessegn che circumscriba la historia legendara dil corv Lea.



Niklaus Jörger da Glion ei vegnius cun ovras dil caricaturist ch'el ha titulau per siu amitg.



Ils anteriurs hoteliers dil Waldhaus, Jo e Marianne Müller, han tgirau in stretg contact cun Hans Moser.

FOTOS ANDREAS CADONAU